



Zoma 13 Nov 2020

Fiarahabana

Faly miarahaba antsika amin'ny Anaran'ny Tompo tafahaona indray amin'izao fotoambavaka izao amin'ity Zoma 13 novambra 2020 ity. Ho amintsika anie ny fahasoavana sy ny fiadanana avy amin'Andriamanitra Ray sy Jesoa Kristy Tompo. Amena.

NY DIA HO AMIN'NY VONINAHITRA na ny lalana ho amin'ny fisandratana :
La marche vers la gloire araka ny **Fil 3.12-4.9** no hojerentsika anio.

Vavaka

Hira 515 Tsara lova ry Jeso ô !

Vakiteny 1. Fil.3.12-16

12 Tsy toy ny efa nahazo sahadry aho, na efa tanteraka sahadry; fa miezaka aho hihazona izay nihazonan' i Kristy Jesosy ahy.13 Ry rahalahy, tsy mbola ataoko fa efa nahazo ny tenako; fa zavatra iray loha no ataoko; manadino izay zavatra ao aoriana ka miezaka hanatratra izay zavatra eo aloha,14 eny, miezaka hanatratra ny marika aho hahazoako ny lokan' ny fiantsoan' Andriamanitra any ambony ao amin' i Kristy Jesosy. 15 Koa aoka isika rehetra izay tanteraka hihevitra izany; fa hasehon' Andriamanitra aminareo izany, raha sendra manana sain-kafa hianareo.16 Kanefa aoka ho amin' ilay efa azontsika sahadry no mbola hizerantsika.

Hira 639 :1,3 Ry miaramila mandrosoa izao

Vavaka

Mba tsy ho variana amin'ny zavatra mandalo na mampifikitra an'izao tontolo izao, toy ny filan-karena, filam-boninahitra, filàna fahasambarana araka ny nofo... fa mandalo (fohy) izao fiainana izao sy ny filàny...

Vakiteny 2. Fil.3.17-4.3.

17 Ry rahalahy, aoka samy hanahaka ahy hianareo, ka diniho izay mandeha tahaka ny anananareo anay ho marika.¹⁸ Fa maro no mandeha, izay efa nolazaiko taminareo matetika, sady mbola lazaiko aminareo amin' ny fitomaniana koa ankehitriny, fa fahavalon' ny hazo fijalian' i Kristy ireny;¹⁹ fahaverezana no hiafarany, ny kibony no andriamaniny, ny fahamenarany no voninahiny, fa misaina ny amin' ny tany izy.²⁰ Fa ny fanjakantsika dia any an-danitra, ary avy any koa no iandrasantsika Mpamonjy, dia Jesosy Kristy Tompo,²¹ Izay hanova ny tenan' ny fietren-tenantsika ka hitovy endrika amin' ny tenan' ny voninahiny, araka ny fiàsan' ny heriny, izay ahaizany hampanaiky ny zavatra rehetra ho Azy.

1 Ary amin' izany, ry rahalahy sady malalako no mahamanina ahy, fifaliako sy satro-boninahitro, tomoera tsara ao amin' ny Tompo hianareo), ry malalako.² Mananatra an' i Eodia aho, ary mananatra an' i Syntyke, mba hiray saina ao amin' ny Tompo izy.³ Eny, mangataka aminao koa aho, ry ilay tena mpiara-miasa amiko, manampia azy roa vavy, fa niara-niasa fatratra tamiko teo amin' ny filazantsara izy, mbamin' i Klementa koa sy ny mpiara-miasa amiko sisa, izay voasoratra ao amin' ny bokin' ny fiainana.

Hira 654 : 1,2 Mba faingàna re, ry mino

Vavaka

Ho an'ireo marary isika. Hisaotra ny Tompo ny amin'ny fandrosoan'ny fikarohana fanefitra amin'ny COVID 19.

Mivavaka ho an'ireo sahirana isika.

Mangataka mba hahay hifikitra amin'Andriamanitra ny olona fa tsy hiantehitra amin'ny olombelona sy ny fahaizany fotsiny.

Vakiteny 3. Fil.4.4-9

4 Mifalia mandrakariva amin' ny Tompo; hoy izaho indray: Mifalia.⁵ Aoka ho fantatry ny olona rehetra ny fandeferanareo. Efa mby akaiky ny Tompo.⁶ Aza manahy na inona na inona; fa aoka ny fivavahana sy ny fifonana mbamin' ny fisaorana no ho entinareo manambara ny fangatahanareo amin' Andriamanitra amin' ny zavatra rehetra.⁷ Ary ny fiadanan' Andriamanitra, izay mihoatra noho ny fahalalana rehetra, hiaro ny fonareo sy ny hevitrareo ao amin' i Kristy Jesosy.

8 Farany, ry rahalahy, na inona na inona marina, na inona na inona manan-kaja, na inona na inona mahitsy, na inona na inona madio, na inona na inona maha-te-ho-tia, na inona na inona tsara laza, raha misy hatsaram-panahy, ary raha misy dera, dia hevero izany.⁹ Ataovy izay efa nianaranareo sy efa noraisinareo ary efa renareo sy efa hitanareo tamiko; ary ho aminareo ny Andriamanitry ny fiadanana.

Hira 498 : 1,2 Ahy va Jesosy Tompon'aina

Vavaka malalaka

Faranana amin'ny vavaka nampianarin'ny Tompo.

Fehiny Kol.3.1-4

Koa raha niara-natsangana tamin' i Kristy hianareo, dia katsaho ny zavatra any ambony, any amin' ny itoeran' i Kristy, Izay mipetraka eo an-tànana ankavanan' Andriamanitra. Saino ny zavatra any ambony, fa tsy ny zavatra etỳ an-tany. Fa efa maty hianareo, ary ny fiainanareo miara-miafina amin' i Kristy ao amin' Andriamanitra. Raha hiseho Kristy fiainantsika, dia hiara-miseho aminy koa amin' ny voninahitra hianareo.

Hira 498 : 4,5 Ô, mba mifalia ry fanahy

Tsodrano 1Pet.5.10

Ary Andriamanitry ny fahasovana rehetra, Izay efa niantso anareo ho any amin' ny voninahiny mandrakizay ao amin' i Kristy, rehefa niaritra fahoriana vetivety hianareo, dia Izy no hahatanteraka sy hampiorina ary hampitoetra anareo.